

校正翼嗣稗編卷二目錄

張子修 大士救濟

喇嘛示寂 蟻國

偷龍王祈雨 聞太師申公豹

仙人治疾 彩鳳

假奎星兆真狀元 花墅給練

趙氏得窖 變牛償負

固始令慘報 尤熙鳳

蠅蝮 龍將軍顯靈

掘窖破家 妙霓

蜘蛛 陳侍郎以理折鬼

餘杭皂隸 痞語

捕亡衙能召盜賊生魂問供

莊方耕侍郎爲武進縣城隍

玉姐

蛇妖

戴疊峯拒狐

借珠

蠶豆不能渡海

二童致雨

張介賓前知

冥律戲殺不抵與陽世同

僵屍開店

白泰官

考閻羅

夢仙愈病

罰停科舉

校正翼嗣稗編 卷二目錄

二

徐庶成真

槐大相公

溧陽焦某

揚州凶宅

商城疑獄

祝由科

松文清

水性輕重不同

建陽二寶

李文貞逸事

拆字

俠報

鬼賣羔

出殃

鬼以財色迷人

占產報

河北秀才

石女生男

女鬼憤母退婿索命

孝女化男

校正 翼馴稗編卷二

北平 湯用中 芷卿 著

武進 徐廷華 子楞 評

張子修

張子修秀才吾郡之荆溪人家貧好學工書善筆札以貧故四十餘尙未娶性疎蕩客游恒數千里鰥居之戚未嘗屑意嘗爲洛陽令魏君記室一日夜分偶思作韻語漏下不續忽聞聽外細語曰張秀才耽吟忘寢矣其聲清細類女子張疑同伴相戲漫應長夜無聊偶作排遣干卿何事聽外答曰我非署中人是霍家翠玉憫君苦吟來破岑寂耳張謂卿意良厚但僕馬齒漸加花月風情懺除畧盡文君琴趣所不敢知聽外應曰君誠莊士但妾非自獻者因與君有舊契特來一了宿因然三生數定與君雖有兩年之叙却無一面之緣但得暗中酬答不願以色身相示也張知是狐啟關延入卽詢居止曰妾陝產明季避兵過此遂止署後廢圃君四世前爲河間富商妻其時妾道術未深偶過其家竊飲樓上藏酒醉不能化形爲商所執君卒勸釋之以是德君尋訪百餘年不期今始得遇由是每夜人定

後輒來劇談堅囑勿洩張有所須轉念立致一夕張胸側忽紅腫作楚夜不能寐將俟女至告以所楚數日杳然張病益劇顙涉怨望女忽至出紅藥數丸張納咽欲吞女呼曰此何物而可下咽速研塗患處遲則潰裂矣如法試之良驗一日女來告別張駭曰卿固云向居署中別將何往女曰緣未盡推之不去將盡挽之不止妾與君實兩年緣今已二十月妾不行恐君不能留也張不解所謂漫以他辭亂之堅矢勿去女曰君非功名中人屯邇歷盡可作富家翁今年逾不惑宜爲宗祀計盍歸圖之澄江當有奇遇張曰僕四海無家一身如寄終年潤筆且不抵衣履費顧安得贏餘爲授室計耶女曰君果定志欲歸區區婚費固不難覓明日入後園李樹下有草梗作如意形卽其下發之當有驗張如言往掘得一小木匣中有金飾四種朱提八枚夜分向翠申謝翠曰報君者尙不止是他日新人如玉並肩唱和時纔信一線紅絲牽引爲不易也次夜復至遞入一袱裏鳳鳥一雙細不盈掬刻鏤花卉異樣工巧曰留此爲新人助妝惜無獺髓膏爲滅頰上癢耳今君事粗就宜速歸遲則山左河南將道阻不能行張謂感卿盛意深入肌骨但相叙兩年餘曾未一覩仙容心殊缺然女曰前固言之此斷不可張固哀之許一握手

爲信春織玉映溫膩如棉張抑搔之忽已不見但聞笑罵曰誠實人復如是耶今且無暇在此早往料理覆舟人去再叩之寂然矣達旦辭魏欲歸魏復出數百金資之行就道二日魏丁母憂未幾河南山左教匪滋事張至澄江居兩月餘遇一翁年六十許各道寒暄展叙邦族答以荆溪張某翁驚曰得勿號子修耶張曰然翁何由知翁大喜曰訪君久矣草舍離此不遠願垂光顧遂與偕歸翁自言姓梁故漢陽賈寄居於此三月間挈女歸楚渡江風作舟覆中流忽一女郎年可十五六後隨兩髻奴掉舟急至援救並獲生全送之抵岸向女申謝女曰君命不死特來相救君女年幾何矣曰十七女願而笑曰我爲若作伐如何荆溪張子修秀才不日將至澄江其人品學皆優年雖差長可壻也言訖條失所在今果相遇息女願侍巾櫛張遜謝翁曰仙人命之矣擇日蠲吉合巹新人婉麗而左頰果斑微癰試出綉鞋著之不失銖黍張夫人雖賈人女而工詩善畫饒有雅致翁無子張席其資遂以富稱夫婦感霍撮合之德設位祀焉

大士救濟

王松山丈族祖緯堂公內姪也隨緯堂公渡臺赴鳳山值奸民莊大田之亂鳳山

城陷緯堂公父子殉烈王由署後逸出匿蕪田內其地近故總兵祝公家夜往叩門公子出留欸之賊之初起也意僅戕官後聞幕友家丁多匿民間遂有逐戶嚴搜之令王窘求拯公子俯思良久曰賊欲得甘心者幕客耳搆有眷屬則渠等不疑可乘間而逸僕表妹張年十七矣以侍巾櫛何如王喜出望外卽訂永好次日公子具小舟載王夫婦至海口一島雜難民中汲山泉取地瓜咽之凡三日探聞賊將搜山王偕婦逃之山後覓衆方結筏渡海亟懇其載甫離岸而賊至其遲行者千數百人悉被屠戮在筏三日糧盡淡水亦斷自問萬無生理忽兩巨人踏波行推一小舟行甚駛條已近筏舟中一赤足婦白衣白裹頭挈一瓶置諸筏瞥然而逝探其瓶皆香粳飯也衆共掬食飢渴若失王歸後終身茹素持白衣咒甚虔蓋感大士救濟云

王姐

陝西興夫魏姓者當三省教匪滋事從軍爲妖婦齊王氏所擄役使養馬魏固巧黠善伺意旨深得齊歡以帳下愛婢玉姐配之玉拒魏曰我乃房縣巨紳某公女城破舉家被殺所以忍死相從至此者欲雪全家之恥耳豈能配汝與臺之卒哉

魏不敢犯相處月餘仍另帳寢一夕女謂魏曰吾觀賊婦徒恃左道祇取滅亡予欲相隨以終乎抑尙思生還也魏曰願聞教玉曰我事妖婦有年凡紙兵豆馬一切幻術盡得其傳惟渠有火龍鞭坐臥佩身人不能近屢欲刺之憚此不敢發汝能聽我調遣其雪此讐乎魏銳身力任雖赴湯蹈火不辭玉喜出胡盧三令箭一付之曰可持此分置某山腰某堡上某要隘自有神兵出戰仍持令箭赴山口待我我此時當往竊其鞭去則易刺或能乘亂殺之與子掃蕩羣孽同投官軍可也魏如言至山揭胡廬蓋有黑煙一縷冒出煙中無數神兵向賊營鼓噪疾趨某堡某要隘分置訖趨山口以待至三更玉飛騎至下馬以帕鋪地令魏同登卽飄然凌空須臾抵徐州界止於山巔謂魏曰頃往竊鞭爲所覺幸早避得不死三處神兵皆爲所破事之不成天也因取金帛一包割裙幅嚙指作血書一通付魏曰持此致吾父於京師我從此逝矣遂仍踏帕凌空東向去魏赴京則其父已罷官回籍遂歸陝惜無有見其血書者

徐子楞曰玉以一孱弱女子陷身賊中沈幾觀變明知火龍難近犯難以興刺血作書焱然而逝功雖不成志亦烈矣獨怪齊婦終歸覆滅乃不殲之於玉手

而必留待撻伐之誅豈生死前定而劫限未滿歟讀此浮一大白

喇嘛示寂

乾隆四十五年後藏第六世班禪喇嘛來朝祝釐居西黃敎寺朝廷之錫賚王公大臣之布施及草地番蒙之所供養無慮數十鉅萬崇禮之侈當代未有咸謂活佛肉身自西天至中土實天下生靈之福忽西山來一老僧踵門求見班禪拒之固請乃出僧曰西方清淨何等自在今無故到中國過受崇奉揆之教旨得毋自歧誤矣誤矣班禪悔悟膜拜求懺悔僧不顧掉頭去班禪長嘆垂淚跌坐禪床登時出痘三日死

蟻國

癸未歲余附漕艘入都同舟歸安沈君出一土橋見示橋以泥爲之橋上一亭雕鏤精絕云昔在四川某縣後荒園中有大石板方廣二丈其平如鏡可鑑縣令某疑下有物使數百人掘去石板見中有一土城街市橋梁道路倉庫無不備具城內復有一城宮殿樓閣儼然王居皆土爲之蓋蟻穴也螳王大如拇指黃甲赤頭小蟻亦長分許衆見其樓閣精工競取爲玩物此橋其一也是夜風雨大作蟻皆

徙去始信槐南龜山之說非盡寓言云

蛇妖

山西岢嵐州署向有白衣美婦夜出媚人歷任官幕家丁被蠱死者不知凡幾某刺史者天師壻也少年科第美儀容到任未一月方燭下治官書偶渴思飲一美婦身着白衣已捧茶至口脂髮澤香麝襲人刺史雖陰有戒心忽不自主自是靡夕不至刺史屏人獨臥室中穢聲達於戶外數月夫人至署見其羸瘠大驚移榻入內并將帶來靈符懸之至夕婦至見符却退俄復至曰天師止能治狐能奈我何掀下衣灑血符上徑登刺史牀但聞噉然一聲家人趨救則刺史已鼻血如泉死矣夫人大慟裝殮畢攜子赴龍虎山泣訴天師命查之喭曰此蛇妖也在嵐縣萬山中修煉三千餘年神通廣大妖類繁多非我自往請老天師不能剿滅遂率法官星夜赴山西選精壯八百人令三百人將雄黃硫黃松香等物縛草束至某山後洞熏之五百人火鎗毒矢伏洞外聞雷聲即起助戰乃登壇作法七晝夜至期聞雷聲隱隱從壇上起洞中湧出白氣彌漫數十里腥穢異常觸之立仆五百人潛伺洞口見巨蛇如楹柱者千百飛出即聞空中金鼓聲衆亦鎗箭并發羣蛇

紛墮最後磅然一聲崖崩石墜一蛇頭大如七石缸蜿蜒至壇前謂天師曰我只傷刺史一人汝奈何殺我全家張口似欲吞嚙忽老天師導一元鶴自空下鶴引吭長鳴者三蛇卽墮地死隨有金甲神以劍斬其頭獻壇下計離壇二百餘步蛇身猶半藏洞內也寸斷焚之洞後人骨山積云

偷龍王祈雨

會稽縣稱山龍池一區在山的北龍王廟外方廣二尺餘一泓瑩然水清見底雖大旱不涸相傳龍神最靈祈雨之法先令健者乘夜偷神像下山其像旃檀雕成長尺餘盛以新布袋畧浸池中然後負之疾趨旣至將神像暫置社廟五日內必雨雨後各耆老擇吉日備儀仗環池跪求僧道十餘人各執樂器念經誦咒俟池面起小泡卽有一龍浮起長三寸許首雙角金線圍腰游泳池面徐以盆請龍汲池水盛之覆以紅紗鼓吹前導迎歷各村送歸神龕旋有黑雲一片隨至須臾濃陰四合大雨如注亦有請至數日而龍身不出者則其年必大旱如請龍到後忽然不見亦必雨土人謂向他方借水去矣龍神行雨必須偷致此理之不可解者

聞太師申公豹

聞太師申公豹係封神傳荒誕之言乃恰克圖四部祀之甚虔山左張城方道土智祿久客恰克圖言其地近接俄羅斯風俗與諸部異地居北海之南過北岸則爲狗頭國每當秋冬海冰即合兩岸相距渺無涯際商旅未敢履冰徑過必詣申廟焚香拜請數日昇像入水試冰其像以木爲之裸體不著一絲昇至海中直立不仆漸次入水俟滅頂即可履冰過海車馳馬驟了無妨碍至次年二三月遙望巨浸中見一指破水出卽羣相告誡速斷行蹤逾數日而拳出又數日而神體全出卽聞堅冰碎裂海水沸騰像卽矗立水面彩輿昇歸報賽惟謹至聞太師威靈赫濯又非申比太師職掌天曹雷部歲旱詣廟虔禱雨卽立降田疇霑足或有冤抑詣廟申訴神即遣役拘拿懲治甚至霹靂一聲被控之人已爲灰燼彼地奉之尤虔此與西藏唐僧孫行者等師徒四衆廟閩省齊天大聖廟皆以厲言而爲後世信奉并著靈異可知人心所向神卽因之不必實有其人也

戴疊峯拒孤

戴疊峯明府初鴻恩至邊城廨下堡焦氏下榻小樓時當暑夜月明如晝四更時瞥見一婦人坐床頭高髻雲鬟冰肌霧縠嫣然流盼綽約如仙驚問何來答曰蓉

城仙子少焉羅襦自解縱體入懷戴心骨俱柔幾不自主繼思子身萬里豈宜輕近鬼魅遽以齒嚙其耳女負痛而起詈曰何來莽漢掌摑其肩倏然不見次早移榻他所臂痛數月始愈勒馬臨崖戴可爲勇於自決矣

仙人治疾

直隸樂亭縣李翁家頗饒晚年生一子忽成瘵疾醫禱並窮翁與典史某善告之故典史曰此間有一異人竭誠往求必能起此沉痾問其人安在曰現在某典舖爲燒火傭得彼首肯則爾子立生矣翁知言往其人年可四十餘涕一尺垂鼻下垢穢不可近翁直前匍匐向之哀求其人曰典史饒舌可先歸備一靜室炊尙未熟勿混我也翁歸灑掃以待須臾其人至令具兩蒲團於室中扶其子出相背而坐其子覺背如火炙痛極欲號其人反兩手緊抱之俄頃腹如轆轤急令如廁下濁膠斗餘復抱其子以口相接覺熱氣從嚙喉下分入四肢融洽暢美約兩炊許曰愈矣其子果愈充碩邈無病時翁大喜酬以金帛不受勉進齋供典史聞之來候長跪求教其人曰安有日在園圃狂狴間而能了道乎子自不行問我何爲典史頓首受教其人起曰盍隨我行乎典史急尾之瞬息已杳涕零而返明日卽投

効去此典史卑棲枳棘獨能物色異人其得於潛修者深矣

彩鳳

新昌孫秀才軼羣清才玉貌工琴善吟咏洒然裙屐少年也家故鄉居偶入城訪
戚歸途遇雨渾身沾濕見道旁有草舍扣門一叟出應延之草堂然火燎衣留款
酒饌家無僮僕僅一婢往來供給翁亦蹉跎甚勞孫不自安乃起挽坐叟言唐姓
中州人流寓於此年七十喪偶止一女彩鳳年十六矣言已亦轉叩孫孫以實對
叟曰觀子儀表必非久下人者室女幸不陋劣願附爲婚媼孫辭已聘固言無妨
僕鐘漏待盡久欲棄家訪道徒以弱息累人今得事君子於願已了孫曰感翁厚
意何敢固却但家有慈母尙容稟白叟曰此固應爾方展叙間天已逼冥叟留暫
宿導至草堂夾室竹床鬆几位置楚楚插架書卷極富壁懸素琴一張叟陪夕餐
畢茗飲劇譚旋見小婢捧衾褥至叟囑安置遂去孫思訂姻之言轉輾不寐俄聞
房後彈琴聲音調清越憂思隱約細聽乃關關之次章孫觸所好披衣起亦取壁
上琴鼓求鳳之操並占菩薩蠻一闋記之詞曰無端一陣纖廉雨天公苦苦留人
住雨後月華生幽人分外明隔窗琴韻度忽把憂思訴輾側睡難安知他玉指寒

天旣明叟出作別回家向母緬述其事母慮物議且恐失母之雛未嫺閨訓不允孫內戀女外迫慈訓心違意迫无計可施久之遂病初猶支離擗挂月餘奄奄一息矣孫固雙桃其從母見其尪瘠詢得其故慙曰姆姆何守頭巾戒殺吾兒我兩人他日將誰依乎遂挽其父赴唐翁謀定涓吉兩娶焉原聘楊固大家女亦嫺翰墨孫得溫柔鄉有終焉之志旣而母促孫入都赴試彩曰途中恐有意外我常偕行孫慮母不允彩曰不必白母我自策早旦朝母請曰郎入都兒欲暫歸省視老父母允之彩囑孫先行逆旅相待三更許果來問深夜何能一人至此彩曰實告君我孤仙也因與子有夙緣故相從由是晝則同事夜則同枕惟孫見之他人皆不見也行至荏平王倫變起賊黨欲屠城孫張皇無措彩搖手令勿聲探懷出紙翦人馬無算大纔盈指向空放去旋見神兵鼓噪而賊疑官軍有備乃駭竄去孫得無恙將抵京辭孫歸留之不可出三藝一詩令孫熟之曰出闌卽歸今科必捷君命亡孝廉明歲亦不能入闌也是科果獲雋旋卽奉嗣母諱不及北上後與楊各生一子一日彩歸寧以兒付楊曰託姊善視飢時但飼以飯切弗與乳也彩去楊愛兒逾於已出兒飢以乳姊之彩歸嗅兒嗔曰與姊云何今違我戒兒不育

矣遂怫然去未三日兒果驚死彩亦從此絕跡

借珠

湖北荊州府關聖廟神冠有辟塵珠一顆大徑寸光照一室相傳唐武后所製某年月朔某中丞詣廟拈香視珠不見拘寺僧問之絕無消息中丞怒嚴飭守令緝獲真盜守令嚴比捕役置其家屬四十人於獄諸捕惶遽無策乃往祝神求示賊踪以便偵緝中丞夜夢關聖來語曰珠係故友張文遠十七世直隸正定總兵某歸途無資問我借典某素重然諾將必來還醒而異之使人偵伺未幾某鎮果親至酬神上珠中丞延見風骨凜然夫聖帝取友必端生平於曹氏諸將與張最契其餘鼠輩固不足數也世閱多代無異生平區區一珠云爾哉

徐子楞曰三國人物與諸葛忠武一鼻孔出氣者在魏惟張在吳惟魯子敬阿蒙輩鼠目寸光宜其不識此義獨怪文若奉孝公瑾伯言諸人號稱俊傑乃亦唯阿流俗附纂竊以就功名不亦陋哉

假奎星兆真狀元

茹古香先生鄉捷後屢赴禮闈不得志大挑以知縣用不復注意科名姊丈某令

中州往課讀茹繩諸甥過嚴諸甥苦之適明春又屆禮試冀其北上可稍寬督責倩人窺意而先生殊不願會上元署中演劇諸甥候先生既寢令優人扮奎星跳舞窗外一須臾而逝先生以爲預兆遂北上是年果大魁返署偶談及前事諸甥笑白其僞先生笑曰非僞也甥等爲鬼神所弄耳衆乃大服

花墅給諫

京師繩匠胡同花墅一區徐健菴相國故別業也屢見怪異人不敢居久益廢敗錢唐馬秋岩秀才性豪放喜其僻靜便溫習儼居焉甫就枕牆壁動搖器皿故盤旋空際叱之頓止次夕復然馬不爲動一夕方展卷忽履聲橐然一朱衣人闖入曰君誠有膽然我葬此二百餘年上居生人則下被薰灼甫幸權門勢謝收召餘魂何意君復實逼處此馬曰幽明異路各不相涉君居我讀胡云不安如嫌夜臺幽寂不妨常來就談藉豁積抱則所願也因延詢邦族鬼愀然曰余前明天啟間給諫也崇禎時爲讐家所中落職間是時天下多事有建白章疏可得聞乎答曰君何言之易也我輩自諸生洊登臺諫求之難保之亦不易一言不慎蹉跌隨之當僕立朝時同官動以彈劾見長封事朝陳國門夕出惟僕請加廠公九錫誅東

林遣孽兩疏極蒙褒納當見施行自謂哲人知幾卒亦以此被議賦命不辰夫復何言馬大怒曰逆豎持權亂政薰燎天下荼毒善良異代猶爲髮指爾乃甘爲鷹犬既不骨鯁於生前又不埋名於身後尙復知人間有羞恥事耶以劍擲之隨手而沒明旦掘地得一朱棺焚之郊外臭聞數里怪遂絕自是枯花稿木復欣欣向榮焉

蠶豆不能渡海

趙山痴舅氏有僕曰許忠役於銅商陳瀛洲家嘗附商舶浮淮其妻私爆蠶豆數升縫置枕中許不知也既道重洋至某地爲諸番交會之所客皆登岸貿易許獨留臥偶於枕旁拾蠶豆數粒爲舟人所見駭曰此大禁物外夷甚貴重卽已熟每顆尙可易銀餅一枚然何以得至此有偷漏者爲蛟龍所攫屢矣因與搜覓得之枕中悉出交易獲金錢甚多歸家出百金於天寧寺豎旛竿以報神貺明年益多市以往甬中流風浪大作兩龍攫舟幾覆舟人曰此必有帶蠶豆者悉投之海龍始去許赤貧如故今旛竿獨存

趙氏得窖

杭州某太守官粵東積金數十萬爲其子捐同知令挈眷赴選自攜妻妾歸恐鄉居緩急時有路經潤州購巨第居焉暮夜斫入複壁藏之人無知者年餘守卒其妻盡遣羣妾而飛書促子歸子未行而亦暴卒婦子身寂處只得售宅趙姓仍扶櫬回杭州并其婦亦不知有藏金也趙得之驟富業嵯遂爲大賈

變牛償負

四川南部縣村民李瑞龍業耕鋤口道光六七年間歲大歉向鄰陳良棟借錢一百千來歲年豐而翁已病謂二子曰老病恐不起所借陳氏錢可速償之此人不仁務取券回免後日累二子如命卽子母並償訖索券則云已失屢取不還未錢李二子勤儉起家陳執券取盈勢將構訟二子不得已邀與立誓贖券再償焉一日陳病卒是夕李生牘額際有陳良棟三字陳妻亦屢夢其夫哀求贖身及聞此異同子往牛哀鳴淚下贖之李不允乃控於官官問牛曰汝果陳良棟乎牛領之問重索李償乎牛有慙色乃令陳出重金贖歸數月而斃

二童致雨

山西榆次縣北門外有二童祠禱雨輒應二童一喬姓年十二一李姓年十三前

明嘉靖丁巳歲大旱徧禱山川不雨里人令二童執香禱於竿山七日亦不應二童相與慟哭日夜不絕聲勸之食不食至夜潛往社稷壇自縊死徧覓得屍葬於壇側越日大雨羣見空中二童指揮遂共立石墓前康熙間榆次又旱縣令設壇祈禱无應適因公赴什鐵鎮夜深回經壇側見二童立輿前異之下輿見石碣始知二童之靈揖而祝曰今邑大旱神如有靈明日得雨當建祠祝畢而去黎明大雨如注滿境霑足乃爲建祠墓側後之守土者往禱輒應

固始令慘報

蕭山陶明府令河南固始縣有孀婦抱一遺腹子控其小叔霸產叔以千金賂陶遂不得理遂婦出婦至縣門號呼曰所以忍恥控官者爲此襁褓物耳今旣不容申訴欲此何爲遂以兒擲署前石獅腦裂而死陶年已望六無子未數月妾姪生子而美陶愛如掌珠旣而罷官歸官橐頗豐子漸長甚聰慧有所索無不曲意承順十四五卽與里中無賴游沈酣飲博靡所不至陶病且死欲一見徧覓得之酒肆陶責之反瞋目大罵陶憤極以手抓胸而死死後子益無忌任意揮霍田宅一空母亦旋亡前見殮陶木美遂欲掘墳鬻其棺有老僕年七十餘心知固始冤恐

拋棄主骨預市一鐔以備檢拾子掘墳取棺後並欲碎其髑髏老僕曰爾報讐亦暢快了究竟主人養爾一場何必至此子忽瞠目若有所思蹶然仆地視之氣已絕矣

尤熙鳳

余少時見姊妹等爲卜紫姑之法法用一箕覆以裹髮縐紗俗謂包頭者繞箕插帚花箕邊豎一簪兩婢扶之向房角設爲問答曰姑娘在家否曰在家梳洗否曰梳洗矣易衣否曰易衣矣曰請升輿卽扶置几上兩女承以拳曰到則俯仰者三以次問休咎均隨所問箕動應之余問能書否能書則三動箕果三動遂易沙盤書一詩云蓬萊宴罷幾何時萬里遙空月上遲劇喜歸來春事好不曾辜負試燈期因問爲仙爲鬼判曰余姓尤名熙鳳明萬歷時孀婦年三十二溺新坊橋下冥王憐我無辜不加罪責不付輪迴游行自如二百年已成鬼仙知諸君風雅願就茗談其時乃正月十三也明日係會期問得會者何人曰趙馥軒次日趙果得彩其他小吉凶隔宿問之無不應驗此後欲請但炷香佛堂前禱之卽至余兄弟相與酬和極多惜年久不能記憶庚午歲大兄將赴北園箕判曰且就南園問中乎

曰中間名次前後曰四十六名果於是科獲雋名數皆符益神之後長生菴一尼至向之稽首品判曰合與有緣汝能謹事我當福汝尼再拜請同行遂去此後再請不復至

張介賓前知

張介賓先生邃於醫生平著述甚富世多宗之晚年尤深於易事皆前知年八十三秋間忽謂家人曰我將死速備殮具既而連日陰雨乃曰道路泥淖走別同人爲難挪後十日再去亦无不可至日以東徧邀戚友歡飲畢講易至隨卦三爻時月色正明乃曰可去矣起身拱手向諸人作別上榻跌坐一笑而逝鼻柱隻垂異香滿室從來有道之士類多預知死期難其從容談笑來去自如也

蠅螻

常州隨陳司徒廟殿宇高峻南宋時所建也有張某醉歸經其地遙見殿隔上火光熠熠如數百金蛇近視乃一大蠅螻也足數百條繞楹而行錚鏦作金鐵聲某倚醉膽壯拾石投之入殿後去至曉往視見柱下遺一足長二尺餘云

龍將軍顯靈

陳文恭督兩湖時鄱陽湖有龍將軍廟照例往祭公心念我欽使也而爲龍將軍致祭竟無一介之接何耶方轉念間忽狂風大作波浪掀天有龍數十萬昂首鼓浪蔽湖而來始悟將軍遣族來接傳命焚棗止之風平浪息穩渡成禮而歸

冥律戲殺不抵與陽世同

常州西門外程印春之女大姑事母至孝母疾割臂肉以進卒不起時大姑年十六貌極美從母適杭州沈氏憐之聘爲子婦迎之赴杭方驛前下船見一卯角女八其舟挾之臥起大姑昏然不能自主飢飽寒煖聽其所爲及至杭扶入青廬從母爲揭障紗大駭殊不類大姑其夫視之則依然美婦也衆勸成禮而歸大姑從此有類痴迷時而自批其頰或頂盆盞跪雨中其夫於其清醒時詰之曰前生孽也我前生爲常州東鄉胡氏女采姑與北鄰張氏女順姑年皆十二日共嬉戲村口有桃一株結實將熟順姑上樹摘桃我從下戲搖樹以驚之順姑失手墜竟死我爲父母痛責未幾亦抱病死順姑尋我多年不意來時適遇於驛前故相從索命耳沈翁固習刑名適幕游歸見婦病狀曰據婦言乃戲殺也況彼此皆在童稚律无抵償理乃具呈於府縣城隍神訴之越兩月无應又具呈催之一日翁晝寢

忽覩二役至其一則素識之左鄰孫方曰所控張順姑一案今日懸牌矣因行文常州移取冊籍故遲於是與大姑一同赴廟聽審已見二卒以鐵索綰一童女至相將入廟傳鼓排衙無異人世須臾城隍神陞座順姑極口號冤神曰汝十二歲應天並非枉死且兒童搖樹事出无心豈能抵命憫汝孤魂無歸令程女爲汝多資冥福可耳命役導沈引媳歸遂醒延淨慈寺僧理懺七日鬼復至曰和尚念經字句多錯誤付度牒冥司不收必得天竺某僧誦金剛經一藏方能托生如其言乃絕城隍神少年白面短須 本朝冠服云

掘窖破家

陽湖汪翁宅後園牆角夜輒有光意必窖金乃乘人靜與姪掘之入土丈許得兩缸對合啟視一物獅身黑毛頭大如顰合目跌坐其中火至目頓開睛光閃爍駭極急覆缸填以土猶聞缸中鼓氣如雷天明始息半月後無故火發房舍悉燼家頓落

妙霓

鎮洋畢生年少工詩丰姿秀雅置之稠人廣衆中鶴立雞羣不啻也嘗遊惠山見

四女那棹舟蓮涇皆作道士裝束年並二十餘悉媚好其一齒最稚尤豔絕生驟觀神移目隨舟遠天暝始返明日復往山下冀有所遇音耗杳然如是月餘亦既心絕氣索矣一日山中閒走信足徘徊經一短垣垣內天桃一株實纍纍墜牆外鮮綻可愛循牆取路曲徑彎環清磬一聲仰見菴傍則紫雲觀在焉拂衣入門一老女冠拄杖出迓叩問法號曰鹿雲年六十矣呼徒衆出皆舟中所見女郎也各道名字曰韻秋曰卽真曰慧真年相若曰妙覺其最稚者生嚙茗畢繞菴隨喜屋宇不多而房櫺幽潔小齋三間陳設楚楚筆硯精良架上插紙一卷展視上寫墨蘭數叢妙亟來奪曰初學塗雅令人齒冷生遂取筆題其上曰抱此絕世姿空谷難爲伍深含一寸心幽香向誰吐坐須臾卽別去由是窺老道士他出蹈隙輒往諸女冠日漸稔熟一日妙窺無人拉生耳語曰吾師久欲誘致君特以我爲餌幸勿再來恐一入網羅不能脫耳方欲再問慧真掩至曰韻師已具齋供生出肴果雜陳烹炮精美韻殷勤勸酬命二眞更疊把盞生連引巨觥不覺醺醉乃掖赴後樓韻與卽疊就淫之終夜不休體爲之憊次早欲起則樓門深扃不能下由是日則晝睡晚則師徒二人疊就取樂生本文弱兼罷奔命未幾雞骨支離無復疊時

玉立矣。韻見委頓遽厭薄之。生自知禁錮已入陷阱。顧已無可如何。惟感妙前言思一面謝。一日未哺。忽聞振管。闢扉。妙攝梯上。謂生曰。我言伊何此樓。已幽死十餘人。今吾師因子已憊。刃卽及子。奈何。生涕泣求拯。妙曰。吾與慧自襁褓爲伊抱來。有同幽閉。効其所爲。固所不願。坐受禁制。亦所不甘。每與慧姊謀各自立。今日幸老道士率師徒遠出。慧姊已謹視前門。子可由後門速遁。遂挾之下樓。揮亟去。生連夜返里。醫藥年餘始就痊。亟爲畢姻而心戀妙美。且感其拯救心德之託。故再如惠山。不敢自往。觀中遣人蹤跡。則去年老道士死。韻以姦逐諸真雲散矣。悵惘而歸。又年餘喪偶。子處無聊。乃送母歸寧。常州自乃薄遊洞庭。主鈕翁家。偶偕鈕翁看花。遇數女郎。其隨一軀之一女。髣髴與妙相似。女亦頻以目注生。生方欲前諦觀。翁急止之曰。勿孟浪。此僕親串。遂與翁同返。叩媼行藏。翁曰。席氏僕弟妻姊有三女。皆殊色。適所遇其季也。生因懇翁執柯。翁諾之。明日赴媼。備言生年少雋才。清門望族。願締永好。媼擇日贅諸其家。初韻秋旣以姦敗。慧妙分竄。各投所親。慧赴毗陵。妙至洞庭。與席媼遇。愛其婉麗。撫爲女。爲之改妝。至是皆大喜。過望彌月。攜歸而生母已於常州先聘得方氏女。生駭汗伏地請罪。母不得已爲並娶。

焉相見則方女非他卽慧也先是母歸常州有方氏表妹由無錫攜一女來云是族女孤無所依故爲子聘之母慮二女不相能及合好後志各無他久乃知其原委云

徐子縹曰近人耳食聊齋謂非才子可及留仙筆妙固難盡誣然云胎息淵雅則未也今閱此文有一字不雅否

僵屍開店

懷寧徐玉英家業頗饒年四十餘病死子方七八歲幸其妻賢能持家故業賴以不墜鄰有莫翁者出外經商十年始返道出樅陽入一飯店與徐遇向固相善初不知其已死也相與握手道溫涼卽就店中飯畢登程回皖一日遇徐子於茶肆翁備言樅陽相遇狀子大駭歸白於母發其墓空棺存焉亟買舟至樅陽訪之果得徐母子直前抱持痛哭徐忽瞠目凝視卽撲地死隨有一少婦奔問具告以故少婦曰十年前渠攜資來此開設飯館獲利甚豐遂娶我爲婦已生一子二女與之寢處无異生人初不知其鬼也視所生子女皆酷肖日中有影不類鬼產云

浙江慶元縣在萬山中縣署建於山陰終年罕見日影至晚卽慢燈嚴扃門戶否則毒蟲猛獸見火光卽來噉人一夜有緊急公事縣令孫某秉燭治文書事畢推戶不能出已爲蛛絲所網大呼從人以火燭之絲粗如繩一蜘蛛徑可尺餘列炬焚之始遯去

陳侍郎以理折鬼

杭州某鉅紳廢第因常見鬼物人不能安頻年扃門陳侍郎某方爲秀才家極貧破屋數間日久將圯徧貸得錢百餘千僦居焉翦闢蒿萊草草佈置甫畢見朱衣幘頭騎怒馬數十人簇擁登堂向陳詬罵曰此我故居汝何得輕占陳問公何人曰前朝侍郎生曰公旣前朝顯達便應知理明帝社稷尙移何論此房屢經易主且人居市塵鬼居墟墓自處分途此宅久廢我以價典並非私佔公名姓不載志乘生前並無功業文章爲世欽仰死後自應埋首重泉有何面目復効安石爭墩耶鬼聞言長歎數聲入地而沒從人亦化黑氣四散惟馬繫庭樹就視一髻靈耳碎而火之怪異遂絕

白泰官

白泰官武進東鄉人精拳勇常爲人保鏢鞠游數省未嘗有敵一歲爲人領鏢至山西入太行山休於逆旅忽一僧持帖來拜自稱鐵肚佛知綠林之魁也白問來意僧曰耳君名久矣將來較藝今憑君先打三拳如不能勝車中物悉當見惠白怒擇要害處盡力擊之僧不少動白大驚僧笑曰技止此乎原銀勿動明日當來取也白終夜自思不能成寢忽憶師言凡遇僧道挺身出鬪者必有絕人之技惟能鍊氣將人道縮入少腹者不可輕敵今僧猶纍然下垂似尙可乘次早僧驍健驟來白迎之笑曰吾師神勇僕已敬佩能再受我一拳否僧曰可蹲伏不動白於數步外取勢蹂進但聞僧狂叫一聲兩腎丸已爲白抉置掌中矣閱年餘白在家閒坐忽一女郎年二十許鬬然入弓鞋縛褲類北人裝束問曰某安在白揣來意不善問卿何人欲見吾師吾師爲人保鏢去約半年方得歸也因留坐獻茶適庭下有堅木數截以指撮之碎如刀削烹茶以進女曰旣汝師他往我鐵肚佛弟子也乞致聲三年後當再奉訪遂去視所步處入石三分許如刀刻云

餘杭皂隸

乾隆間餘杭南湖水大漲隄將潰縣令某遣諸隸役督人夫填土旣而水大至令

躍身入願代民命遂淹斃水圍城三日不決卒賴保全水退農田民舍漂沒殆盡有二隸既死猶手持鋤鍤直立不動後縣令爲本邑城隍神居民並肖二隸像於廡下頗著靈異隸生時喜飲火酒啖燒餅凡有疾百事輒持二物往禱無不應有某生性狂縱謂區區二隸何敢妄受人間血食指像罵詈而去歸家大病亟往謝過始得痊

痞語

少時見徐州來一嫗腹中有一痞能作人語呼爲老神仙能召亡言已過事多驗後適鄉居某戚家忽指廳事階下曰有窖金五萬兩然應汝家子孫物若欲早得須我禱祝方可主婦信之允謝百金次夕呼工匠至嫗忽以手自擊曰何物妖婦敢以福利之說惑人如不速供當先撮爾髮言畢嫗戰栗跪地自言實因窮苦有口技者授以此術能閉氣從腹中作語痞乃用僵蠶薰腹捶以巨磚久自墳起操此術遊江南十餘年獲利無算不意今日始敗言畢踉蹌出門去附其身者爲戚家亡祖云

考閻羅

長白麟兒亭河師因壬寅歲河決挑工被議發東河効力隨鍾雲亭河帥同駐工次夜夢黃衣武士持牌如校尉狀召赴試卽乘馬隨之至一處朱甍黃瓦類帝王居宮門外約集二十餘人有孫給諫素所相識相與屏息以俟俄聞啟扉唱名以次而入殿廡下列坐矮几如廷試然題爲毋自欺論各就席構思論成繳卷退出門外一時許聞鼓吹開門一朱衣人擎榜出所取三人第一孫次某部郎次乃麟也繼而傳呼雷動數力士掖孫入須臾出某部郎次入最後麟入跪丹墀下仰視上坐顙面長髯者爲關壯繆旁坐一人豐頤偉幹鬚白如銀勉勵數語令暫歸俟命麟遂出旣醒異其夢不知何徵及以京堂需次都中偶憶前夢往訪孫閣人以病對登輿欲行忽閣人急奔出日家主已知大人至有要言請就臥內面談麟入見孫曰頗憶同考事乎我先赴召君當繼至麟叩攝何職曰七殿閣羅也問向所見白鬚者爲何神曰明代孫曰谷先生也次日孫訃至不一年某部郎卒麟又越二年而逝

捕亡術能召盜賊生魂問供

武進所轄東安鎮有某紳設一典肆一夜羣盜數十人持械至劫掠一空并傷二

夥縣令嚴比諸捕莫得主名有薦西鄉某秀才善捕亡術紳延至閉之後圖秀才曰當召盜魁生魂至親鞫之人定後秀才披髮仗劍禹步作法設一香案以斗米炷燈案下列空鐺書符誦咒約一更許令人伏鐺口聽之寂不聞聲又焚符促之漸聞鐺中有聲細纔如蜂復大聲叱曰從實速供鐺中泣曰緩我縛我當實說遂云身本東安鎮縫工姓李有弟向入白龍山匪黨昨歸述及貧苦起意糾諸匪爲盜分得番銀一百四十餘餅現以半埋篋下其黨某某往某地方一一俱吐明白天已大曙秀才欲封其魂鐺中待晚再鞫紳謝之遂釋去告官緝之果悉符合問李是夕作何狀曰夢多人縛往陰司欲置油鑊肉磨遂一一認供不意其爲夢也

夢僊愈病

吾鄉楊立甫秀才丙午夏感受暑濕兩足酸軟不能履地誤投剗劑嘔吐狼籍脾胃大傷日啜粥一甌久之粒米不進自分待斃一夕夢羽士清癯似鶴揭帳見之以手挽令起出艾一莖自頂顛拭至胸口繼又徧摩其腰脇並兩足已曰愈已遂別去楊醒腹中漉漉有聲覺饑甚呼粥連啜數甌下床試走病若失意所夢殆遇仙歟

莊方耕侍郎爲武進縣城隍

管松崖漕帥叔母年老孀居常僱一媼相伴媼服役甚勤長齋禮佛終日不離左右一日晨起忽失去金釵一枝以媼服役多年斷不出此必家中婢僕輩所竊管夫人怒窮治之衆口呶冤乃相率具香楮禱於武進城隍廟以明心跡是夜夫人夢有公差攜武進縣城隍銜燈從窗外過次早方話其異一老乳媼暈絕遽起趨廳事坐曰余武進縣城隍莊某也似此小竊細故何必遽白公庭管夫人驚跽曰此皆家人輩欲明心跡以致驚動但不知果係何人所竊抑或遺忘神以手指曰竊物者至矣果見某媼手捧金簪跪階下其事遂白

罰停科舉

丙午浙江鄉試寧波某生文甚愜意交卷時適遇其同廝友以卷示之共相擊節且細爲檢視添注塗改無誤乃同赴至公堂投卷面出次早擬進二場某生曰諸君速去我不進場矣衆問故曰我卷面有八字朱書必已被帖衆謂君卷我輩共覩並無字跡何得妄言生執意不去至三場入闈見至公堂帖出一卷係卷面朱書大宗絕嗣罰停十年八字監臨以朱筆非應試應攜之物擬俟二場點名時問

之不意生竟不赴故至三場始貼內堂云

徐庶成眞

羅提軍思舉爲偏裨時率鄉勇百餘人逐賊於老林窮追數日賊竄無蹤山徑紛歧時已逼暮視所裹糧又盡相顧躊躇遙望一峯高插雲漢攀藤附葛力竭纔達半途喜得有茅庵可免露宿甫入一古衣冠叟出迎鬚眉皓白狀貌甚偉羅前致敬叟曰山中無盜賊虎狼將軍可暫宿此旋出包穀一筐曰荒山無菽麥聊以充飢命衆分食須臾立盡羅食其一腹亦竟果及曉將行叟謂羅曰將軍不久建節從此荷三十年封疆重寄當爲一代偉人勉之因指示曰由此出山且得大捷羅叩姓字曰徐庶羅時尙未識字卽庵前插箭誌之下山遇賊生擒渠魁賊平羅駐老林要隘以緝餘匪覓土人導往舊宿處則人庵俱杳建廟祀之

徐子楞曰將軍草澤餘生奮跡戎馬出奇制勝儼然狄武襄岳忠武後身吾常張晴湖刺史曾官其州父母多稔將軍故事謂其投謁軍門面陳方略身入虎穴手縛雌王竅舉電發眞令入覺毛錐子無處生活余時方少惜不能記憶後爲佟鏡塘中丞記室中丞言昔官迤南時將軍爲大理提督愛恤士卒衣食與

同某日與家將以射鏑賭跳爲戲某地有兩崖對插霄漢一崖略見人跡其一壁立萬仞無徑可登一日將軍令卒荷三百二十斤鐵戟視人跡所登取路直達崖巔少憩將軍卽解襪出鐵尺二委之地一手持戟聳身至對崖掘坎植戟仍跳而過率衆下山焉後將軍調任別省出已節縮廉費銀六千貯藩庫以備公用嗚乎料事明臨敵勇待士仁約已廉雖古名將何可多見哉

槐大相公

濟寧城中大街有古槐高與雲齊千年物也樹根鎖鐵鍊釘鉅石上相傳樹幻形至如皋娶一婦生子女自言槐姓山東濟寧人出資營運獲利甚巨顧十餘年不言歸亦未寄一音書家人疑而詰之槐曰現已致富會當言旋遂將貨物脫售收拾貲本攜妻子返濟寧既至謂舟人且止此俟我先歸舟人尾之入東關大街忽不見徧問居人無知者繼而見有衣巾挂槐樹上悟爲樹精遠邇譁傳爭來看祝州牧慮其風影鎖以鐵鍊釘之母子買屋居樹旁以槐爲姓焉

溧陽焦某

溧陽縣刑書焦某也立心端直每爲人排難解紛鄉里敬愛鄰子某少年好勇鬥

狠焦常左右之心甚德焦一日焦籠燈自外歸遇鄰子於河邊掬水磨刀霍霍然焦覩其神色有異問深夜磨刀何爲鄰子曰頃從友人飲酒歸不意吾婦與左鄰某秀才共坐調奸爲我所執已縛置屋中欲斷兩人頭耳焦取其刀視之咩咩曰此何能殺人設殺之不成兩人或逸其一爲禍非細我有苗刀係先世所遺血人無算以借子何如鄰子喜以歸焦出酒令少飲以壯膽氣密使其妻入鄰子家解二人縱之比鄰子操刀入室則床上已空知爲焦所紿盛氣奔至焦笑曰癡兒何爲二人調奸未成殺之且抵即使幸獲無罪殺一婦復娶一婦所費幾何今汝婦行爲如此留之無益視其稍有姿色何不鬻之既可得價爲再娶資且免辱門戶計亦良得隣子氣稍平納其言適有西賈欲娶妾見婦美以二百金購之隣子亦別娶事閱十餘年焦已忘之後偕其戚幕遊陝西適川楚教匪滋事焦挾貲南歸中途遇賊流轉至晉境經一鉅鎮見佛寺方賽會焦匍匐寺外冀乞些錢米救饑忽有健奴數十騎怒馬高呼夫人至羣僧袈裟出逆見鉅車至門婢媼數十人簇擁一麗人入聞號救聲回眸諦視覺甚稔熟問係何人曰深陽焦某麗者驚曰果恩人耶胡爲至此乃亟喚其蒼頭至耳語囁嚅不可聞已而蒼頭掖焦至鎮中

一大宅扶入客房具湯沐易衣履進酒饌款接甚豐焦窮途一旦至此不解所以夜分兩婢攜紅燈導麗者至拜伏不起焦錯愕亟跪請故麗者曰妾即昔日所救刀下人也當時相妾者乃後夫之夥妾夫姓霍曾爲京卿擁資數百萬無子得妾連舉兩男適嫡妻卒扶爲正室今兩男長者十六已成孝廉少者十四亦遊庠矣遂呼二子出拜閱日夫歸婦詭焦爲叔云少失父母賴叔撫養成人犬厚酬之慨贈千金焦喜出望外捆載欲歸婦夜出以二箱助裝灑泣而別抵家發之珍玩燦然嚮之得值鉅萬由此營逆遂爲素封其子挾賞遊漢陽醉後誤推一客跌地適觸燭錐殞命已以故殺擬抵在獄中廉訪某公親鞠之審其語操潯陽土音細詰籍貫及祖父名諱遂以誤殺定讞得釋歸即當年所縱之秀才也焦以無意活二命卒兩食其報冥冥中豈真無皂白耶

楊州凶宅

楊州凶宅甚多誤儼者往往立見禍崇南河下有一乏商鉅第某連判廉其值居之恒見怪異偶夜歸索飲時已三鼓從者人廚呼庖人起良久不至僕相繼往者三人皆不至某親持燈往則四人縱橫臥於地急呼舉家驚起救醒問之皆曰方

至廚覓火忽壁間一鉅人出長舌寸許渾身黑毛金睛巨口遽相撲卽驚仆云遂移寓去

李官人巷一宅西鄰有空屋相傳有祟人不敢居久之并此宅亦扃鑰尹陸君灑脫人也僦居之初無他異或曰比鄰有土地能爲禍福宜致祭享陸不肯次日衙門堅閉使數人闢之不能啟或曰此卽土地爲祟陸不之動薄暮有白鬚繭袍者登堂詬罵曰我淮安老人也何物讎官敢來慢我陸怒擲以硯倉皇遯度其復來預覓鳥鎗及獐犬二伏廳事後次日哺老人果率小數十餘輩操戈蜂擁而至發鎗擊之老人唧唧滾地化爲黃鼠狼死隨從盡爲獐犬所殺皆其黨類遺一小纓帽戴水晶頂珠云

商城疑獄

張明府敦仁令商城時中年喪偶獨居二堂之側每夜睡醒輒聞床前地上嗒嗒有聲問之不應拍床叱之即止一夕月明如晝響又作揭帳視之一鬼披髮浴血向床叩首張知有冤披衣起坐叱問何人欲訴何事鬼惟以手指口啞不能言因諭之曰旣不能言冤何由白鬼乃以手指床前棹下盤旋化作黑烟而沒次早呼

人就所指處掘之得鮮血一團並無屍骨莫可證據有老茶房年已八十餘云乾隆初年有白宦官此白滇人攜一啞子常在厨下打掃一日忽不見羣譁爲逃今所見母乃是歟張以事隔六七十年又無左證不能窮究每謂人言生平治獄未敢稍有出入惟此鬼之寃不能爲之申雪殊深慙負耳

祝由科

祝由科治疾今惟辰州法甚驗余童時過縣學場見有操此術者爲人治病皆應手愈一日兩人扶一媼至腹大如鼓令解衣視之臍凸出寸許叩之囊囊作石聲術者曰吁危矣姑試爲之乃取一活雄雞以鉄杖插入其口穿腹援出視杖上無點血乃曰此尚可治命取一空罈來以厚紙糊其口向腹戟手書符口中喃喃誦呪卽即聞腹中漉漉有聲腹脹漸減須臾遂如平人間媼所苦若何曰若失矣破罈傾之則皆碧水也又有人臂生瘍疽大如盞術者以一針指楹柱間書符誦呪如前狀針忽旋轉不已移時桂上陷入寸許而臂腫已消衆歛資贈之不受余所見以符水賺錢者極多惟此最爲神驗聽其口操楚音度亦辰州派也

松文清

相國童時在吉林爲人飼馬蒙古某公簡放吉林將軍夜過其地忽見馬草中火起遣人往撲至則並無火光惟一黑虎臥草堆上將軍親往遠視猶虎逼觀則一蓬髮童也呼醒問之奇其狀貌攜歸撫爲己子教之讀書習射阿文成公一見許爲偉器臨歿仁廟臨問卿歿後誰可然大任者以公及慶相國保對屢任封疆爲一代名臣勲業具載國史生平喜書虎字廣東撫署二堂往往多怪異公書一大虎字鎮之怪遂絕得其虎字者懸之室中能愈瘡嘉慶二十五年六月仁廟幸熱河七月公忽披髮席藁望東晝夜哭未幾而大行上賓信至識者駭公之前知矣

水性輕重不同

水性南北各異即上流下流亦迥不同吾常西門之水與東門輕重懸殊語音清濁亦異似西北之水重於東南亦有不盡然者

純廟御製玉泉山天下第一泉記云常製銀斗較京師玉泉之水斗重一兩塞上伊遜之水亦斗重一兩濟南珍珠泉斗重一兩二釐揚子江金山下中冷泉斗重

一兩三釐則較玉泉重三釐及三釐矣至惠山虎跑則各重玉泉四釐平山重六釐清涼山白沙虎邱及西山之碧雲寺各重玉泉一分選則更無輕於玉泉者乎曰有乃雪水也常收積雪烹之較玉泉斗輕三釐雪水不可常得則凡出山下而有冽者誠無過京師之玉泉故定爲天下第一泉

建陽二寶

黃壁庵刺史文瑄云建陽虞氏家有二寶其一爲連環竹圈二枚大如杯口厚二分環相連欲析爲二須藏於衣底得暖氣則分仍於衣底連之即合爲一其年建陽火災虞氏析此圈爲二擲于空際有光一圈漸大如屋覆所居四圍鄰居皆燬獨虞宅無恙火熄圈自落兩圈仍合爲一其一爲絹本畫一銅盆畫已闔黑置之極明處亦無所見貯水盆內取畫張之俯視水面纖毫畢露壁庵館虞氏曾親見之

李文貞逸事

安溪李文貞公先代聚族鄉居國初時有劇盜亦李姓據其祠宇公方九歲隨其翁封糴立稠人中爲盜魁所見呼之進撫摩而嚶咻之謂封翁曰你這孩子讓

與我我便挈衆他往誓不相犯封翁不知所答時族衆已共聞哀懇於封翁曰此事固非人情所堪然爲保族起見功德莫大況此子岐嶷他日未必不復歸願熟思之封翁無可如何私以問公公毅然曰惟父所命盜魁喜甚擇吉張燈設宴與其妻高坐中堂令封翁領公行父子禮盜魁本有一子少公一歲行兄弟禮事畢乃送封翁獨歸而令公以父子相稱公不從盜曰適已從何忽改也公曰適遵父命不敢不從今父不在何從之有於是盜欲困之閉置一室少與之食翼日入視殊無所苦如是數日備施荼酷公陽陽如平時盜妻曰我相此子實非凡品困乏其身實所不忍且福命甚大死之亦所不能不如竟舍令去而以我子轉託從古綠林無不敗之局我既與彼同姓將來或藉以延一綫血食亦未可知明日遂召封翁領還以幼子付託撫養刻日統衆盜他去盜伏誅幼子以附封翁故遂世其家今安溪族譜有另支附譜後者卽幼子所傳也嗚呼何物盜妻乃能識之於總角之時卒賴以保全一綫誰謂巾幗中無鉅眼哉

拆字

折字偶爾觸機往往奇驗乾隆丁卯福建鄉試場後聞某處有善折字者詣之士

子拈得因字其人曰國中一人今科解首也同行友躍然曰我亦就此因字曰此科恐無分或後有恩科可望得志彼因出於無心君因出於有心也又一人以所握摺扇指因字曰我亦就此字一決其人蹙然曰君扇適加因字之中乃困象也其終於一衿乎後各如其言

俠報

楊州鹽商查某嫁女富室趙氏半途大雨彩輿避於街亭須臾又一輿至則寒士胡某娶於曹者查女聞曹女哭甚哀心動遣媵問之曰女子適人遠父母兄弟誠大苦事然何至傷痛乃爾答曰母家故貧所適益饑是以悲耳查女惻然俗於新嫁娘袖巾多貯珍寶爲之壓袖查乃以袖貯兩荷包囊各藏黃金一錠使婢納曹懷中少頃雨霽匆匆各去曹以金畀夫權子母不數年遂爲大富廣市田園房舍而兩籍之夫妻皆好施與鄉曲善舉無不竭力一郡推爲善人逾十載始生一男愛若掌珠擇乳媪哺之連十餘人皆不當意最後一媪年三十餘貌端好舉止亦大方喜而留之婢僕囑之曰屋後小樓每日清晨主婦必屏從人焚香慎勿隨往違不汝恕也一日攜兒嬉戲樓下時兒已能行匍匐梯桄將盡沒級媪亟前扶掖不

覺隨登惟見一龕南向繡幕低垂揭視則嫁時壓袖物也不覺失聲聞者奔告訊之媼以實對且曰昔日途中遇雨並貯金贈一嫁娘不圖今日落魄至此語罷復痛女聞默然促尋其夫來須臾夫至引入見媼即令婢僕捺令端坐夫婦盛服跪曰曩蒙贈金者乃愚夫婦也向非夫人無有今日所有財產絲粟不敢自主故均分而兩籍之因指儿上簿鑰謂媼曰此皆夫人物也言已促坐捧卮親自行炙極歡乃罷送歸東院則房舍几案以至陳設器用與女無異女道安置訖乃返先是媼生一女以傭乳故寄養他人至是迎歸即以字所乳子兩家世爲婚姻如朱陳焉嗟乎千金一飯乃於兒女子遇之世稱淮陰不復作飯淮陰者又何人哉

鬼賣糕

吳江董某偶遊蘇州虎阜於千人石畔遇故鄰許某擎糕一盤高聲叫賣見董卽來寒暄並贈二糕董憶其已死烏得尙在因問何時至此曰在此七八年已有家室因邀董至僻處謂曰我陽壽未終誤服藥死一靈未散賣糕爲生幸勿洩也舉手而別董歸告其家赴蘇尋之終不復見

出殃

俗傳人死回煞北方謂之出殃京師安定門外某姓有新喪延陰陽生檢出殃日告之期且曰此殃異常必爲大厲合家徒避仍恐不免惟街卒某多力而胆太當邀禦之其人卽往延卒酒食告以故某素負有胆許之至期夜坐三更許砉然一聲棺開尸已起急登棺力按之相持至雞鳴始帖然喪家歸問答以無事告于陰陽生生愕然曰誤矣殃之歸正在今夜然其厲更不可言仍非某不可某懼失大胆名姑又應之躊躇門外一測字者過猝問曰汝目動而心悸當實告我不然且死某訝其前知告之故測字者探懷中出爆竹三枚火繩一握授之曰鬼甚厲爾但登屋以俟有急放爆竹一枚三放可無事矣卒如教夜半棺裂如前尸出見某蹲屋上欲躍而登某放一炮卽仆少頃復起如是者三雞旣鳴尸不復動往視陰陽生則已暴死徧身作硝磺氣蓋陰陽生于某卒有夙恨欲殺之且神其術欲禍人而自禍爆竹之慘鬼神爲之陰謀果何益哉

徐子楞曰此煞卽陰陽生爲之

鬼以財色迷人

蘇州南禪寺棟宇傾頽榛莽四合陰雨晦冥鬼聲達旦殿後有軒三楹頗幽潔賃

居者輒頭痛死目爲凶宇無敢入者尤秀才敬庭西塘先生之文孫家貧力學喜其地僻賃廉遂下榻焉攜琴載書嘯詠其中夜分忽有叩扉者啓入則少女如仙容色絕代笑謂尤曰夜深攻苦得勿寒耶詢所自曰妾西鄰簪室嫡妒甚朝牙而夕楚之久矣獲親風雅幸垂援拯尤正色拒之不去加以呵斥始怫然出次夜復來出黃金一挺置案上求爲畫策尤曰書生不解預人閨闔投金戶外乘女往拾急閉戶顧女已化爲厲鬼在室矣曰此漢鐵石我以財色二字已連鹽六人腦得子而七則大道立就汝雖堅拒能舍汝耶突前相撲持至雞鳴始倒地沒天明呼僧就倒處掘得一屍焚之患絕

占產報

揚州吳某運署庫吏也與沈蓮叔都轉之司閹孫某爲莫逆孫素擁資將死以其妻朱託之末年餘吳力勸改適連贅兩夫皆以反目去吳謂朱曰連贅而皆去又無子女異日奈何朱泣乃徐曰我以子嗣汝何如朱大喜子亦將順極得歡心朱傾所有付之子卽白眼吳踪跡亦絕漸至衣食不周貸於吳亦不答朱具呈控官吳備疏朱穢事榜之通衢朱氣憤自縊吳子市薄棺葬遂占其宅一日清晨吳赴

肆啖湯餅畢下樓見孫夫婦立樓下驚倒輿歸暴卒方歛火自堂前發棺與妻子燼焉

河北秀才

乾隆時莊方耕侍郎視學河南臨行有友人謂曰天下第一好漢常某河北秀才也宜物色之及按臨衛輝果有常某滑縣人試文平平姑列高等懸牌另日發落至期常來謁見弱不勝衣一顧影少年也因述願見之意常抑然自下但求訓示又再三問卒不肯言以一指徐按案頭硯盒而去盒纖毫無損啓視硯已粉碎異之後聞一人習跳躍三十年縱橫二十丈自爲無敵訪常常令試躍微哂之其人曰君能追及我否常笑曰可於十丈外試躍當邀君回其人如言躍未離地常已挈之轉矣技神至此宜爲江湖推重

石女生男

廣州府高青書太守官廷瑤安徽時因無子納妾入房則石女也遂還其家後移粵東又囑友娶麗人至締視仍前女蓋已五易主矣高惻然曰命注乏嗣又何辭但此女旣爲天廢若再退回必至淪落不如留之使侍巾幘焉未幾女私處暴腫

患疽潰爛疔愈而否塞盡開納之落紅殷然後舉一男少年登第聞此女貌豔如花乃徧歷數省卒保完璧爲高延一線嗣皆高片念惻隱有以致之也

女鬼憤母退婚索命

六合劉生家貧力學食餼有年三十餘喪偶欲圖膠續有富室葉翁者以女字焉翁歸白媼媼曰擇壻數年得此窮措大何以爲門戶光遂大哭詈迫翁退婚翁憤逃入城劉聞之取婚帖擲還比鄰蔣翁吾邑人也流寓其地開設飯館女阿二當壚有姿色蔣聞是事欲以阿二字之生感其意而嫌其所出微翁示之家乘則固武進望族遂締永好是科丙午劉捷於鄉同人劇資爲生娶婦鼓吹導彩輿過葉門翁大慚越三日新婦晨起理裝見鏡中立紅衣女郎遂推鏡大呼取翦欲自劉罵曰汝何奪我快壻蓋劉合卺之夕卽葉女長繩畢命時也劉知爲鬼所憑折桃枝擊之曰而父母憎我貧索婚帖去汝何敢無恥強來纏人以桃枝打之鬼遂去數日葉媼縊死蓋其女憤無所泄遂移禍於其母云

孝女化男

建平楊翁務農夫妻年六十止一女貞姑年十七性至孝事父母先意承志父病

不起女刲臂肉三寸許煎湯服之良已父顧女嘆曰汝誠孝可惜終是女身吾鬼其餒矣奈何女聞日夜露禱願賜一子爲父母嗣續計夜夢一白頭媼以帕裏蔗四寸橘二枚納女衾中旣醒覺私處墳起大驚急白母母隔褲探之則偉男矣大喜過望徧告隣里爲之易冠後娶婦生二子